

嵩

書

嵩書卷之十四

韻始篇三

宋

五言古詩

河陽秋夕夢與永叔遊嵩避雨于峻極院賦詩  
及覺猶能憶記俄而僕夫自洛來云永叔諸君

陪希濬祠岳因足成短韻

梅堯臣

都官員外郎

夕寢北窗下青山夢與尋相歡不異昔勝事却疑今  
風雨幽林靜雲煙古寺淡

此二句  
夢中得

攬衣方有感還喜

問來音

希淡惠書言與師魯永叔子聰幾道遊嵩因誦  
而韻之

梅堯臣

聞君奉宸詔瑞祝趨靈岫山水聊得遊志願庶可就  
豈無朋從俱况此二三秀方辭建春陌十刻殘晷漏  
初經緱氏嶺古栢尚鬱茂却過轅轅關巨石相撐闢  
夕齋禮神祠法袞被藻繡畢事登山椒常服更短後  
從者十數人輕齋不爲陋是時天清陰力氣勇奔驟  
雲巖香虧蔽花草藏澗竇傍林有珍禽驚聒若避殼

磐石暫憩休泓泉助吞漱上窺王女窻嘶絕非可構  
下玩搗衣碓焜耀金紋透尹子體雄矯攀緣逾習狃  
歐陽稱壯齡疲軟屢顛踣競歡相扶持芒屨資踐蹂  
八仙存故壇三醉孰云謬鄙哉封祀碑數子昔鍋鏤  
偶誌一時事曷虞來者詬絕頂瞰諸峰隘然輕宇宙  
逸思謝塵煩欲知羣鳥獸韓公傳石室關之固已舊  
當時興稍衰不懶苦尋究東崖亂壑中釋子持經咒  
于今二十年飲食同猿狖君子聆法音充爾溢膚腠  
嘗期躡屐過吾儕色先愀蓬華真諦言茲亦甘自咎

中頂會幾望涼蟾皓如畫紛紛坐談譚草草具觴豆  
清露濕巾裳誰人苦羸瘦便卽忘形骸胡為戀纓綬  
或疑桂宮近斯語豈在督歸來遊少室嶠崿殊引脰  
石堂迢遞過探訪仍邂逅捫蘿上岑巖仙屋何廣袤  
乳水出其間涓涓自成溜凡骨此薰蒸靈真安可覲  
霞壁幾千尋四字侔篆籀咸意吾辭文誠為造化授  
標之神清洞民俗未嘗違忽覺風雨冥無能久瞻扣  
忽忽遂宵征勝事皆可復俚歌縱喧譁怪說多駁糅  
凌晨開塞陽追賞顏匪厚窮極四百里寧憚疲左右

昨朝書報予聞甚醉醇醉所嗟遊遠方心焉倍如疚

天封觀

梅堯臣

車馬雲外來衣沾半山雨弭節扣真居捫蘿笑塵矩  
迴溪響石松靈茹抽巖塢玉檻刻年華應無媿前古

啓母石

梅堯臣

曠哉嵩室陽神怪所棲宅蒼石不知年靈熊去無迹  
煙巖想桂宮苔壁疑椒掖不學舜娥悲瀟湘竹枝碧

少姨廟

梅堯臣

雲祠古殿淡少室群峰碧行雨欲隨車望巖非化石

常聞蘭氣蒸誰真椒香液寄謝洛川妃凌波定何益

輾轅道

梅堯臣

險絕稱漢關晨躋瞻二室盤紆石路回  
逶迤雲峰出古壁挂青蒼天風起蕭颼  
洛城西首時望望平煙密

公路澗

此下十二題范歐二公俱有作

梅堯臣

我來袁公溪斷岸猶殘壘僵柳遠臨灣  
新蒲初出水行行古臺近兩兩驚禽起  
雞犬何處闌人家溪塢裏

拜馬澗

梅堯臣

玉子青凌寬國人茲拜馬依稀月夜笙  
聲入寒泉瀉

空傳七日期飛鶴何時下

二室道

梅堯臣

度嶺失群山千峰出天際方欣左右看屢改縈迴勢  
勝事與誰同芬然有蘭蕙

自峻極中院步登太室中峰

梅堯臣

稅駕綠巖前攀蘿不知倦人從樹杪來路向雲端轉  
忽覺在煙霞回看峰嶺變

玉女窻

梅堯臣



玉洞倚雲壁大窻露微明  
駉鸞去不返啼鳥空相驚  
萬木自虧蔽捫蘿空復情

玉女搗衣石

梅堯臣

有石稱搗衣搗衣人不見  
雲纓白飄颻巖樹長蔥蒨  
猶應寒夜中山月來鋪練

天門

梅堯臣

古壁何蒼蒼穿雲玉梯出  
炊然起青冥却立觀少室  
前嵒復後峰陰晴狀非一

天門泉

梅堯臣

泠泠雲外泉的的巖光入靜若仙鑑開寒疑玉龍蟄  
時應下鹿群印跡青苔濕

天池

梅堯臣

安知最高頂清淺水池開有時片雲出倏忽生風雷  
誰羨雙黃鵠刷羽來徘徊

三醉石

梅堯臣

相期物外遊共醉仙臺石舉手薄高穹清風生羽翼  
都忘塵世煩笑傲聊爲適

登太室中峰

梅堯臣

日夕望蒼崖  
嶄嶄在天外  
及來步其巔  
下見河如帶  
半壁雲霧昏  
山根已滂沛

峻極寺

梅堯臣

山高路已窮  
倏爾逢蘭若  
落日老僧閒  
支頤古松下  
緩步入禪庭  
蒼苔但瀟灑

公路澗

范仲淹

參知政事  
謚文正

嵩山發靈源  
北望洛陽注  
清流引河漢  
白氣橫雲霧  
英雄昔此地  
百萬曾相拒  
近代無戰爭  
常人自來去

拜馬澗

范仲淹

傳聞王子仙澗邊遺逸驥當時青雲路雞犬亦可致  
未必真龍媒悠然在平地

二室道

范仲淹

太室何森聳少室欲飛動相對起雲霞恍如遊仙夢  
何以寵此行行歌降神頌

自峻極中院步登太室中峰

范仲淹

白雲隨久來翩翩疾如馬洪崖與浮丘襟袂安足把  
不來峻極遊何能小天下

玉女憇

范仲淹

窈窕玉女憇想像玉女粧皎皎月為鑑飄飄霓作裳  
莫學陽臺夢無端惑楚王

玉女搗衣石

范仲淹

但見巖前砧誰聞月下杵金文與鐵色璨璨知千古  
試問搗衣仙何如補天女

天門

范仲淹

天遊絕境遊熙然揖灑氣下顧莽蒼間雲雷走平地  
天威不遠人孰起欺天意

天門泉

范仲淹

天門有靈泉塵埃未嘗至日月自高照雲霞亦輝媚  
惟抱夷齊心飲之可無媿

天池

范仲淹

嶽頂見仙池神異安可度勿謂無波濤雲雷有時惡  
乘此澄清間吾纓亦可濯

三醉石

范仲淹

巍巍八仙壇上有三醉石憐此高陽徒如樂華胥域  
憔悴澤邊人獨醒良可惜

登太室中峰

范仲淹

嵩山最高處逸客徧登臨  
回看日月影正得天地心  
念此非常遊千載一被襟

峻極寺

范仲淹

徘徊峻極寺清意滿煙霞  
好風從天來吹落桂樹花  
高高人物外猶屬梵王家

公路澗

歐陽修

太子少保文忠

驅馬渡寒流斷澗橫荒堡  
槎危欲敵岸花落多依草  
擊波翫游儵倒影看飛鳥  
留連愛芳杜漸下四峰照

拜馬澗

歐陽修

昔聞王子晉把袂浮丘仙  
金駿于此墮吹笙不復還  
玉蹄無跡久澗草但荒煙

二室道

歐陽修

二室對岩堯群峰聳嶮直  
雲隨高下起路轉參差碧  
春曉桂叢淡日下山煙  
白芝英已可茹悠然想泉石  
自峻極中院步登太室中峰

歐陽修

繫馬青松陰躡屐蒼崖路  
驚鳥動林花空山谷人語



雲霞不可攬直入冥冥霧

玉女窻

歐陽修

玉女不可邀蒼崖鬱岩直石乳滴空竇仰見沱寥碧  
徒倚難久留桂樹含春色

玉女搗衣石

歐陽修

玉女搗仙衣夜下青松嶺山澗風露寒月杵遙相應  
靈蹤杳何尋片石秋光瑩

天門

歐陽修

石徑方盤紆雙峰忽中斷呀豁青冥間蓄泄煙雲亂

杉蘿試舉手自可階天漢

天門泉

歐陽修

煙霞天門浹靈泉吐巖側雲濕顛氣寒石老林腰碧  
長松暫休坐一酌煩心滌

天池

歐陽修

高步登天池靈源湛然吐俯窺不可見淵默神龍護  
靜夜天籟寒宿客疑風雨

三醉石

歐陽修

拂石登古壇曠懷聊共醉雲霞半酣樂忽在千峰外

坐久還自醒  
日落松聲起

登太室中峰

歐陽修

望望不可到  
行行何屈盤  
一逕林杪出  
千巖雲下看  
煙嵐半明滅  
落照在峰端

峻極寺

歐陽修

路入石門見  
蒼蒼淡靄間  
雲生石砌潤  
木老天風寒  
客來依晚照  
徙倚聽山蟬

箕山

歐陽修

朝下黃蘆坂  
夕望箕山雲  
緬懷巢上客  
想彼巖中人

弱歲慕高節壯年嬰世紛  
漱流羨潁水振衣嗟洛塵  
空祠亂驚鳥山木含餘曛  
聊茲謝芝桂歸月及新春

潁大夫廟

蘇軾

團練副使贈  
太師諡文忠

人情難強回天性可微感  
世人爭曲直苦語費搖撼  
大夫言何柔暴主意自慙  
荒祠傍孤塚古隧有殘坎  
千年惟茅焦世亦貴其膽  
不解此微言脫衣徒勇敢  
登封縣宇觀少室

邵雍

處士諡康節  
先生

天地始融結此山已高極  
群峰擁旌幢巨石羅劔戟  
日出崖先紅雨餘嵐更碧  
安知無神仙其間久遯跡

七言古詩

贈許道人

歐陽修

洛城三月亂鶯飛，潁陽山中花發時。  
往來車馬遊山客，貪看山花踏山石。  
紫雲仙洞鎖雲深，洞中有人人不識。  
飄飄許子旌陽後，道骨仙風本仙胄。  
多年洗耳避世喧，獨臥山巖聽山溜。  
至人無心不算心，無心自得無窮壽。  
忽來顧我何殷勤，笑我白髮老紅塵。  
子歸為築碧前室，待我明年乞得身。

送龍茶與許道人

歐陽修

潁陽道士青霞客來似浮雲去無蹟夜朝北斗太虛  
壇不道姓名人不識我有龍團古蒼壁九龍泉澗一  
百尺憑君汲井試烹之不是人間香味色

戲石堂山隱者

歐陽修

石堂仙室紫雲深潁陽真人此算心真人一去升寥  
廓歲歲巖花自開落我昔曾爲洛陽客偶向巖前坐  
盤石四字丹書萬仞崖神清之洞鎖樓臺雲澗路絕  
無人到鸞鶴今應待我來

五言律詩

石淙

王贊

三司副使知揚州

磴道山巖下茅楹竹樹中  
澗潭魚可見攢石路纔通  
坐聽潺湲碧縣思爛漫紅  
平生立壑志覽此興何窮

寄嵩嶽吉上人

李若谷

太子少傅諡康靖

結菴嵩少深高道恐難倫  
苦海好求寶天花莫著身  
一心俱已了五字更應新  
誰謂孤雲跡名曾達紫宸  
天后三陽故宮石淙懷古  
張仲武西京轉運使  
二室盤遊日三陽宴喜心  
分流來萬壑巨石擬千岑  
玉殿煙蕪在金碑雨蘚侵  
翠華何處問山水自清音

緱氏縣二首

歐陽修

亭後徹郊畿人家嶺坂西青山臨古縣綠竹遶寒溪  
道上行收穗桑間晚漑畦東皋有淡趣便擬卜幽棲  
其二

秋色滿郊原人行禾黍間雉飛橫斷澗燒響入空山  
野水蒼煙起平林夕鳥還嵩嵐久不見寒碧更孱顏  
過少林輒書四韻兼貽慶長老

王彥輔承議郎

天人千岳碧林收萬古春靜中淡有境嶮外絕無鄰



官牒嬰行色禪關脫世塵安心無覓處斷背爲何人

七言律詩

呈大德禪師有序

尹輔大理司直守登封令

大德偃卧林泉罔求聞達蓋以道行久著聲華自  
高故得丹詔遠臨紫衣就降信有光于法侶足以  
榮彼僧門輔方捐道風備嘗真味喜觀殊命形諸  
詠言謹錄咨呈幸希采覽

支遁行藏惠遠才幾年嵩少避浮埃八行丹詔雲間  
落一對紫衣天上來誦律夜窻寒月皎閉門秋渚白

蓮開名高自達君王聽就降殊恩不假媒

宿少林寺

文彥博

太師潞國公謚忠烈

六六仙峰繞佛居俗塵至此暫銷除西來未悟禪師  
意北去還馳使者車予方受命移守北都五品封槐今尚在九  
年面壁昔何如心知一宿猶難覺花藏重尋貝葉書

登嵩頂

邵雍

九州環遶若棋枰萬歲峰高看太平四海有人能統  
御中原何復有交爭長憂眼見姦雄輩但願身為堯  
舜氓五十二年蕪沒事如今方許看春耕

和登封裴寺丞翰見寄

邵雍

陋巷簞瓢世所傳，予何人斯恥蕭然。既知富貴須由命，難把升沈更問天。靜默有功成野性，騫驥無路學時賢。紛華出入金門者，應笑溪翁治石田。

依韻謝登封劉李裴三君見約遊山

邵雍

諸公見約往嵩前，重走新詩各一篇。擺落塵埃非敢後，訪尋雲水奈輸先。三陽宮近叢幽石，萬歲峰高竊紫煙。多少勝遊俱未到，願陪仙躅共攀緣。

事自有高高峻極詩

浮丘峰

誰知方丈與瀛洲塵世紛紛漫白頭不到嵩山最高處世人容易揖浮丘

三鶴峰

昔有仙翁住此間煉成青髮與朱顏一朝跨鶴參天去澗草茁花豈復攀

遇聖峰

漢家天子學神仙曾遇真人耳過肩不待菖蒲長黑

髮須知逸樂自延年

萬歲峰

仙仗西來感百神  
泥金檢玉尚清新  
山靈知是真天子  
萬歲聲中第一人

玉鏡峰

皎皎冰盤瑩百圍  
廣寒宮殿見依稀  
春山萬疊渾如洗  
浮翠光中一鏡飛

獅子峰

蒼苔藤蔓飾鬚眉  
獅子標形是與非  
果解嘖呻作哮

吼窟中狐兔定魂飛

虎頭峰

萬里封侯相不知道人曾此獲陰符  
軒牙露舌驚樵采猛士還當捋爾鬚

起雲峰

觸石孤飛一葉蓬雷公電母晝鞭龍  
但知四海為霖雨不道中天第幾峰

鳳凰峰

當年翔鳳此徘徊曾為真人覽德來  
今日飛鳴天外

過紛紛燕雀不須猜

金壺峰

相見金壺寫墨河  
皂林餘潤鬱嵯峨  
伯陽當日傳經後  
肯向山陰與換鵝

華蓋峰

華蓋峰高未易窮  
捫參歷井到天中  
回頭却顧人間世  
但見群青似小童

玄龜峰

玄武名峰古所傳  
晨昏吐氣作雲煙  
雖無鑛灼剗腸

患歲晚風霜亦可憐

臥龍峰

頭角低回蘚蔓封  
蜿蜒端似臥真龍  
旱乾歲禱多靈應  
時見油雲出此峰

會仙峰

鶴乘雲輶下九天  
玉盤星子竟誰先  
想應漢武題花品  
留作人間聚八仙

子晉峰

當年曾悟鏡中形  
道骨仙風擬紫冥  
二十四峰明月



夜玉笙須向揖仙聽

玉柱峰

丹楹未羨人間侈玉柱一峰天外高自古大材須大用扶持廣廈豈辭勞

老翁峰

翳霧埋雲皓首翁難將書傳考前蹤商山羽翼朝家後化作中天一石峰

玉人峰

漢武求仙未得仙玉人何事落巖前故知帝主乘雲

下神蓋峰頭啓洞天

玉女峰

玉仙曾此駐雲車日薄窻紗映雪膚  
七字天書人不辨定知玄女手中符

獨秀峰

或云金匱峯

孕玉懷金不待媒  
翳然佳氣罩崔嵬  
天教秀拔諸峰上  
未信狂飈解折摧

積翠峰

翠幄籠雲自一家  
蘿梯夜碾七香車  
舉頭雨過餘霞

散綠芰池開菡萏花

太白峰

仰攀日月風雲近俯瞰岡巒培塿低絕頂光芒長不  
斷人言太白此中棲

宋四明樓昇建中靖國初令登封志稱其有惠政  
而不詳其狀今觀其詩若賦固非俗吏輩也惟是  
按籍求所謂芙蓉菡萏二池及揖仙臺仰嵩堂盡  
皆化爲烏有矣至序引李得柔勝之想亦韻人而  
其詩復久逸不可見五百餘年予爲樓君之新令

尹神交精合若將寤寐遇之所可彷彿遺躅百一者僅此殘碑斷簡耳千古風流不絕如綫後之視今亦猶今之視昔也可勝歎哉可勝歎哉

穎考叔

王十朋

太子詹事  
謚文忠

衣冠肉食謾紛紛誰解杯羹感悟君穎谷封人雖賤士却能純孝至今聞

外方長曰宋都汴以洛爲西京嵩介乎其間崇福宮祠在此山下計當時楮紳軒車至止者接踵矣而題詠不少概見何哉予披舊簡尋遺碣稍汰其

不雅馴者得若干篇止耳中有不能盡汰者詩以  
人重故也噫安得盡按一代之全集而進退之哉  
金

四言古詩

李道人嵩陽歸隱圖

麻九疇應奉翰林  
文字

城郭維崇井里維通冠蓋維錯紈綺維聚云誰之子  
招子歸嵩舍我箏筑樂彼潺淙食彼瓦缶遺我鼎  
鐘云誰之子繪子歸嵩離人友鹿避俗朋松石嚙  
我足泉瘦我隴吾恐時人笑子歸嵩有山有恠有

水有龍盜出寇沒嘯兇咻能吾恐狂人誰子歸嵩  
子謂我言決意歸嵩歸嵩何如如鴻避弋如鶴脫籠  
與幻俱化與化俱融是以歸嵩 南山重重翠如植  
葱北山隆隆紺如堆銅仰嵩俛嵩雨濯雲烘嵩之為  
我我之為嵩 我聞子言衣如張風心先去鳥層雲  
盪胸靜言思之富為目嵩貴為心蓬飾說于令詎知  
任公歸嵩良是生龜脫筒子不歸嵩送子歸嵩

五言古詩

宿少林寺

趙元武勝軍節度使

雙輪走雞棲下嶺分間道行行得精舍翠崦作迴抱  
諸峰知客來故故顏色好征衫滿塵土慙媿方丈老  
殷勤一瓣香爲我除熱惱世緣如落花籬裊跡俱掃  
箇中有佳處行脚恨不早一菴祖師傍異日親結草

會善寺恠松

馮璧同知集慶軍節度使

嵩高地氣靈花木競妍秀玉峰西南趾有松獨恠陋  
偃蹇如蟠螭奮迅如攫獸葉勁鬚髯張皮古鱗甲皺  
菌蠢藤瘦怒支離筇節瘦月上虬影搖風度雨聲驟  
子落慰枯禪枝樛礙飛馳盤根萬乘器平蓋千歲壽

樵斤幸免尋屨匠矧肯構龍化會有時天旱期汝救

雨後看竝玉所控諸峰

馮璧

竝玉如高人壁立九千仞一日不見之令人生鄙吝  
春淡木葉敷秀色益濡潤結茅寄僧藍晴碧時相赴  
老宿詫孫峰隅侍到齟齬連延青一色枚數須諦認  
溟濛空翠間我亦疑未信朝來雲氣昏埋沒瑜匿瑾  
如蒼梧政愁湘妃鬱思舜重陰俄解駁霽澍夕暉襯  
娟娟忽層出歷歷分遠近雲峰互吞吐千狀纔一瞬  
出奇如孫吳相降如廉藺如衆星拱辰如侯伯入覲



接武如朋簪承迎如价儂負固如吳楚爭長如齊晉  
恠詭如夷蠻駢羅貢琛贖窘蹙如擒獲係纍將就纍  
如應龍神靈蟄臥時奮迅如天馬超軼坳牧稅羈勒  
如雄對改容失筋駭疾震如猛士無譁攢槩俟嚴陣  
獨兩峰巍然魁傑儼崇峻光輔岳柱天鬱為中興鎮  
降生申與甫周室僨復振詩傳配崧高百世磨不磷

王華山同元好問裕之

雷淵翰林修撰

洗耳潁川水療饑西山薇山川得佳客草木生光輝  
末路風教薄此道日已微相期千載事非君誰與歸

九日登少室絕頂同裕之 雷淵

閒居愛重九佳人重相過登高酬節物少室鬱嵯峨  
迤邐謝塵土夷猶出煙蘿欵如據鰲頭萬壑俯蜂窩  
浩浩跨積風瀾瀾渺長河日車昃紅輪天宇凝蒼波  
指點數齊州如覺氛埃多我無倚天劍有淚空滂沱  
驚鱗盼奧渚倦翼占危柯悔不與家來結茅老巖阿  
歸途睠老阮廣武意如何

會善寺恠松

雷淵

物生自有常恠特物之病嗟嗟此老蒼恠恠生魁柄

侏儒蹙髀股宿瘤擁腮頸蜿蜒蛟龍戲騰擲貙虎競  
鬚髯喜張磔意氣怒狂迸匠石求棟楹節目足譏評  
芻蕘急薪樵堅悍空盼瞪靜言觀倚伏未易相弔慶  
雖違時世用顧免斤斧橫陽秋莫榮悴歲月何究竟  
盤盤曲則全挺挺獨也正小草悞掃迹伏神還守性  
儻隨天中景廣宇共麻映

箕山

元好問

左司員外郎

幽林轉陰崖鳥道人跡絕許君棲隱地唯有太古雪  
人間黃屋貴物外祇自潔尚厭一瓢喧重負寧所屑

降衷均義稟泊利忘智決得隴又望蜀有齊安用薛  
干戈幾蠻觸宇宙日流血曾連蹈東海夷齊采薇蕨  
至今陽城山衡華兩丘垤古人不可作百念肝肺熱  
浩歌北風前悠悠送孤月

同雷淵希顏再登箕山

元好問

千年箕山祠蘿徑淡以悄桂樹不復見禿藪餘秋篠  
盤盤盡絕頂石冢平木杪長風萬里來筋骸覺輕矯  
側身望巖竇解衣憩林表是時夏春交野色亂青縹  
川光乍明滅地脉互縈繞岡巒蟻垤出井邑蜂衙擾

紅塵洛陽昏白雲太行曉玄功信冥漠一覽疑可了  
悟彼東山人胸中魯宜小

少林

元好問

雲林入清溪禪房坐蕭爽澄泉潔餘習高鳥喚長往  
我無玄豹姿漫有紫霞想迴首山中雲靈芝日應長

純孝伯廟

元好問

洩洩潁谷雲融融潁川水封君去我久水雲自清美  
人言君善諫微意得鄭子特于悔悟時一語發天理  
大孝勒金石土苴及頑鄙反身而未誠善諫且敗矣

如何千載下乃與茅焦比我行潁水邊永念負甘旨  
願作鯉與魴因之曰千里

緱山置酒

元好問

靈宮肅清曉細柏舍古春人言王子喬鶴馭此日賓  
白雲山蒼蒼平田木欣欣登高覽二化浩蕩融心神  
西望洛陽城大路通平津行人細如蟻擾擾爭紅塵  
蓬萊風島濼鬢毛日夜新殷勤一杯酒媿爾雲間人

七言古詩

題元裕之家山圖

趙元

繫舟盤盤連石嶺牧馬澄澄倒山影山光水氣相混  
涵中有元家菴盧井鴈門一開豺虎場駕言投迹嵩  
之陽青山偃蹇不可將十年竟墮兵塵黃東巖風物  
知猶在說與寄菴神已會一揮淡墨能似之清輝遠  
寄形骸外元家故山吾與鄰夢見不如圖畫真舊曾  
行處聊經眼未得歸時亦可人

愛詩李道人若愚嵩陽歸隱圖

雷淵

我家崧前凡再期詩僧騷客相追隨春葩繽紛香澗

谷泉噴薄清心脾霜林置酒曳錦障雪嶺探梅登  
玉螭重陽夜宿太平頂天雞夜半鳴喔咿整冠東望  
見日出金輪湧海光陸離神州赤縣入指顧風埃未  
靖空歔歔窮探極覽不知老泉石佳處多留題簡書  
驅出踏朝市期會迫窄愁鞭笞襟懷塵土少清夢齒  
頰棘荆真白癡叩門剝啄者誰子道人面有熊豹姿  
披圖二室忽當眼貫咏編貝多文辭我離山久詩筆  
退舉寫豈復能清奇再三要索不忍拒依依但記經  
行時道人愛山復愛詩嗜好成癖未易醫山中詩友



莫相厭遠勝薰酣聲利兒

嵩山恠松謠

李純甫

京兆府判官

阿誰栽汝來幾時輪囷擁腫蒼虬姿鱗皴百恠雄牙  
髭擎空夭矯蟠枯枝疑是祕魔巖中老慵物旱火燒  
天鞭不出睡中失却照海珠羞入黃泉蛻其骨石鉗  
沙錮汗且僵埋頭臥角政摧藏試與摩娑定何似怒  
我振觸鬚鬣張壯士囚縛不得住神物世間無著處  
隄防夜半雷破山尾血淋漓飛却去

送郝講師住崇福宮

元好問

大方之家幾知津郝君七十老斲輪書文五車喙三尺劇談混沌今猶神太玄博士為絕倒君言誇矣天公嗔長安冠蓋羅青雲洛陽車馬爭紅塵恠君掉頭不肯住寂寞來作由東鄰崧高維嶽古所秩三十六帝有外臣玄都石壇待飈馭宮殿突兀松輪囷上界僊人鄧雲山洞天治所名司真蓬萊方丈去不遠明星玉女時相親瑤華可擷蘭可紉煙霞永隔塵中人黃鵠一去不復還長驅萬里誰能馴為我殷勤謝登君玉華歲晚當平分

雪中自洛陽還嵩山

元好問

道人薄有塵外緣，迫入塵埃私自憐。  
三十六峰一茅屋，夢入西家掠社錢。  
津津喜色見眉宇，峩峩青城當眼前。  
蹇驢逕入風煙去，恰是梅花欲雪天。

嵩山玉鏡

元好問

玉鏡見尙許，今日東山陞。積雨洗昏霾，旭日發光輝。  
奪人目灩灩如動移，初如秋月圓漸如曙星微。  
曙星不能久，併與晨露晞。此鏡從何來，造化祕莫窺。  
山精或寶氣，恍惚令人疑。誰為問岳祇，山川英秀會。

有歸不能生申與甫瑞王國萬丈光芒徒爾為

五言律詩

留題崇福宮

趙秉文

上護軍天水郡侯

山面削瓜碧宮墻鋪粉光晴嵐天自雨夏竇冷噴霜  
勝地松杉古仙家芝朮香東鄰與西舍欠我一茅堂

太室同希顏賦

元好問

壯矣崧維嶽盤盤上窈冥中天瞻巨鎮元氣有遺形  
雨入秦川黑雲開楚岫青鰲掀一柱在萬古壓坤靈

少室南原

元好問

地僻人煙斷山澗鳥語譁清溪鳴石齒暖日長藤芽  
綠映高低樹紅迷遠近花林間見雞犬直擬是仙家  
少林雨中  
元好問

西堂三日雨氣節變蕭森偃臥復敬臥長吟時短吟  
鐘魚四山靜松竹一燈淡重羨禪棲客都無塵慮侵  
送母受益自潞府歸嵩山  
元好問

薄俗科名賤孤生志願違正須謀獨往何暇計群飛  
泌水真堪樂荊州况可依青山無舊隱此日羨君歸  
贈汴禪師  
元好問

道重疑高蹇禪枯耐寂寥  
蓋頭茅一把遶腹箴三條  
趙子曾相問馮公每見招  
風波門外客無事且相饒

七言律詩

遊少林寺

許安仁

汾陽節度使

巖壑深嚴入翠微  
少林金碧霧煙霏  
五峰屏簇禪菴  
小萬劫天開佛日輝  
聞說九年空面壁  
得逢二祖便傳衣  
千秋少室山靈在  
曾見先師隻履歸

追述嵩山之遊

有序

馮壁

元光間予在上龍潭  
每春秋二仲月往往與元雷

遊歷崧少諸藍禪師汴公方事參訪每相遇輒揮毫賦詩以道閒適之樂今猶夢寐見之兒子渭近以公故抵任城禪師附寄詩以叙疇昔未幾駐錫東菴因造謁間出示裕之數詩醉筆縱橫亦略道崧遊舊事感歎之餘漫賦二首

性理諸方已徧參歸來一錫駐東菴山中蓮社舊招隱旅舍阿戎新對談詩筆如君僧有幾文章媿我老無堪綾書大字拈香疏須趁微之酒半酣

其二

少林脩竹欲天參，竹外幽閒草結菴。  
顧我雖存惟白髮，與君曾此共玄談。  
干戈橫絕境猶夢，草樹荒殘人豈堪。  
臘瓮松醪髯莫預，商歌悲壯不能酣。

會善寺

元好問

白塔沈沈插翠微，魏家宮闕此餘基。  
人生富貴有遺恨，世事廢興無了期。  
勝槩只今歸鷺嶺，煙花從昔繞龍墀。  
長松想是前朝物，及見諸孫賦黍離。

望崧少二首

元好問

嵩少飛來崑閬山，山家茅屋翠微間。  
雞豚鄉社相勞



苦花木禪房時往還結習尚餘三宿戀殘年多負半  
生閒長河一葦人千里望斷西城碧玉環

其二

飲鶴池邊萬木稠養龍崖上五峰秋藤垂絕壁雲添  
潤澗落哀湍雪共流田父占年驚玉旆詩仙留迹歎  
崑丘西風落日山陽道空對紅塵憶舊遊

懷州子城晚望少室

元好問

河外青山展臥屏并州孤客倚高城十年舊隱拋何  
處一片傷心畫不成谷口暮雲知鄭重林梢殘照故

分明洛陽見說兵猶滿半夜悲歌意不平

嵩山承天谷

趙秉文

煙霞直上逍遙谷路轉山腰咫尺迷已覺洞天分聖境更疑石蹬是仙梯霜添紅葉黃花好天與金壺玉柱齊

兩峯名

醉倚西風正南望暮雲煙草一時低

送裕之還嵩山

王偃右司郎中

高懷不受簿書侵清潁鷗盟欲重尋老去宦情知我薄閒來道念見君深對牀夜雨他年夢滿馬西風此日心嵩頂勝遊誰得共仙門仙馭待知音

次韻呈戒壇惠公堂頭

路公宣武將軍行  
芝田縣令

官如馬足在泥塵喜見高吟日日新已竊謝公三載  
祿難甘原憲一生貧徒勞碌碌當年學且樂陶陶此  
日春幸對清風與明月不知誰是箇中人

復繼仲寧堂頭韻

釋承燮

門外曹溪路不賒炷香煙縷裊風斜玄談磊落鑑冰  
雪花翰清新燦綺霞祖刹金燈風續焰少林鐵樹雨  
開花庭前大石圓如斗一點難侵意轉嘉

七言絕句

望少室

許安仁

名山終不見真形萬仞巖巖上杳冥安得雲間跨白鶴下看三十六峰青

少室道中

許安仁

少室峰頭曉月沈千家城郭淡陰陰五更雞唱殘星滅馬上看山過少林

少林寺呈堂頭和尚

盧庸

定海軍節度使

萼嶺穿雲路屈盤少林古寺傍巖巒此行本爲安心法今日吾師與我安

登嵩山絕頂抵宿盧巖

盧庸

飛梁倒挂虹霓落列障遙連翡翠鮮巖樹溪禽盡相識一春踏遍萬峰巔

石淙

張毅

安撫使

潁水洗餘高士耳是非猶恐汚人牛區區武媚何爲者水上磨崖紀宴遊

過嵩山

辛愿

處士

滄老年光滾滾來好懷知欲向誰開箕山潁水春風裏呼起巢由共一杯

王華谷同希顏裕之

李獻能

鎮南軍節度副使

玉龍落峽噴飛流空翠霏霏晚不收  
軟脚山堂一壺酒暮涼閒對兩峰秋

酬子京禪師見贈之什二首

元好問

南風穩送北歸船留得虛明一指禪  
嵩少詩僧幾人在因君迴望一悽然

其二

舊遊重憶故人詩一點青燈兩鬢絲  
不似戒壇明月

夜杏花香裏唱歌時

自註云往在嵩山時陪馮內翰雷御史遊戒壇詩中所道蓋當時事也

元

五言古詩

中嶽投龍簡 并序

吳全節 真人

皇慶二年歲在癸丑四月甲子詔玄教太宗師張留孫醮大長春宮弭星芒禱雨澤也聖天子敬天愛民一誠之發其荅如響禮成命玄教嗣師真人吳全節正議大夫太常卿李允中奉金龍王節投

諸嵩洞入山之初一雨端霽歲祀之際輕陰護涼  
咸謂使命必當有紀謹賦五言詩一章以彰聖治  
云

陽城天地中坤靈奠神嶽積翠千層霄元氣遠盤礴  
降神生申甫形勢控伊洛啗啗虎豹蹲偃蹇蛟龍躍  
猛士橫戈矛奇陣出幃幄簇簇羅旌旗魏魏聳臺閣  
玉鏡為誰開金櫃為誰鑰遠近列畫圖週遭峙郭郭  
萬狀不可名起伏互連絡皇皇聖帝居歷代重封爵  
老栢浮蒼煙古殿蝕丹腹天朝混華夏秩禮特優渥



皇慶二載春宵旰軫民瘼有旨醮長春玉簡命新琢  
詔臣走登封香幣致虔恪邃洞藏寶符瓊音降笙鶴  
三呼今復聞祥風度天樂小臣奉明祀三使陟雲嶽  
箕山勝可家潁水清可濯遐想飲牛人高風動寥廓  
賜玦知何時分我雲半壑歌詩勒嵩珉用贊聖人作  
七言古詩

題王子晉

童南谷

集賢院侍講學士

擬棄萬乘追浮丘仙成駕鶴緱山頭碧桃千樹鎖金  
洞玉笙嘹唳天風秋回眸下笑蜉蝣輩蝸角爭戰污

濁世何當高氣凌霄霞願隨環珮聯雲騎

緱山謠

張廓

進士

一作張全

緱雲輕緱月明緱山仙人弄雲月徘徊鸞鶴吹玉笙  
仙人忽輕舉山頭雲月悠悠薄太清浮丘真人學道  
成丹砂九轉飛零星羽衣芝蓋遙相迎游軒駕鴻相  
與朝王京海日峇堯射青闕霞崆峒烘赤城下瞰  
塵寰滄海桑田平紛紛萬乘兮如癡蠅菌蜚暑促兮  
不暫停大道茫茫兮其自靈故山柏桂兮煙冥冥邦  
人思舊兮未忘情香火燁燁兮祝清明青天寥寥兮

望霓旌飲鶴池邊幾番兮春草生

七言律詩

遊法王寺呈學公長老

梁宜

河南府路總管

坡巘寬圍箕掌圓峰巒高倚翠屏鮮偶迷樵跡愁無  
入忽得禪關喜有緣漱石溪泉夏環珮隨崖蹬路纏  
蜿蜒最憐崇塔如迎客雲外亭亭出碧巔

奉祀嵩嶽夜宿少林寺

李允中

太常卿

蔥嶺當時遇宋雲手提隻履果何因入山便得安心  
法立雪能來斷臂人錫卓一泓雲浸影花開五葉地

生春無勞照石瞻遺像滿目青山是法身

面壁石影像

李允中

長江折葦渡如神梁武何曾識異人一日棺中忘隻  
履萬年石上現全身功成面壁禪心苦法後傳衣佛  
眼真非我有緣遊五乳誰能廓達悟微塵

遊嵩嶽二首

蒲理翰雲南僉事

嵩嶽巖前缺作橋重樓朱宇隱層霄道人步月拾瑤  
草童子倚雲吹玉簫春滿石壇遲晝景龍藏金鼎長  
丹苗苔封少室山前路何許高人索價饒

其二

名山到處駐征駢來訪幽棲杜德機雲蓋浮丘千歲  
井煙籠玉女五銖衣唐碑猶有丹砂頌漢室全無青  
鳥飛風捲長松清嘯發珮環聲響九天微

中嶽投龍簡

蒲理翰

自喜華巔預此行遠齋綸旨告功成典謨會與唐虞  
竝文武更祈申甫生人意達時天意合金龍投處蟄  
龍驚歸途巖壑清風響疑是當年萬歲聲

嵩山

鄭棐 偃師縣主簿

一重山隔一重雲一澗花藏一澗春  
泉石任渠輕俗客煙霞元自重  
高人指開松影杖頭濕踏破苔痕  
屐齒新笑我青山未歸老蕭蕭鞭  
馬軟紅塵

宿少林

史公賢

河南僉事

巡行偶向山中宿嵩嶽西南少室前  
靜愛嶺雲輕世味暫隨僧飯絕  
葷羶松風蕭颯來疎雨翠障空濛  
起暮煙面壁巖頭千古月寒光寂  
寂解逃禪

代祀嵩嶽夜宿少林

童南谷

西來碧眼一胡僧曾渡寒蘆隱  
少林半夜傳衣逢斷

臂當年面壁悟安心一庭雪積山猶在五葉花開月  
未沈奉命頒香瞻隻履菩提樹底得幽尋

遊少林寺

程相參政

杖屨徒登禮少林亂山佳氣鬱森陰松杉色露真如  
相禽鳥聲傳梵國音可笑九年閒面壁却憐二祖與  
安心西來一曲調青舌白雪陽春和到今

題王子晉

李好文廉訪使

黃屋非心敝屣然玉笙吹斷鶴昇天載瞻今日叢祠  
地詎數當時定鼎年琬琰真書文半剝塵埃舊壁畫

猶鮮當途却顧荒山上萬柏森森鎖暮煙

送月上人謁少林隆老

釋寥一

隻臂伽黎不作難將心到處遣人安瓶離汴水秋風  
冷錫入嵩峰夜月寒篋裏贈詩經雨曬囊中施鉢對  
風餐心知擬就東林宿已向林稍薦刹竿

五言排律

嵩高山三十韻

孟同員外郎

維嶽橫空闊靈根自古長孤高臨上國厚重壓中央  
雨過龍潭黑風生虎口狂崇高封自漢丹鼎就因唐



樹號將軍柏山呼聖主昌真珠晴洒露瀑布冷歎霜  
幾郡遊中頂諸峰仰上方道宮濃靄覆書院白雲藏  
九節菖蒲翠三花貝葉芳許由墳自拱啓母石非常  
更淺逢鸞鶴雖淡絕虎狼泉流成五渡岳祕護三章  
亂眼山禽碧供厨野蕨香御題千尺筭儒構十三堂  
遊客終無倦居民自不忙城周三面等屏翠四時張  
夕照分羅漢脩篁擁法王夜閒聞遠籟天靜見扶桑  
正列星辰位高承日月光明霞千樹現垂乳幾人嘗  
上去樵迷路飛穿鳥失行賣松人下嶺采藥叟歸莊

橫企來方息時機住可忘影資全庇廕勢遠不低昂  
字古書蝌蚪石竒立鳳凰發威雷忽震降福雨時霧  
萬壑寒枝直千崖古蘚蒼穴浚留羽客洞遠得瓊漿  
繪事圖難定詩家狀莫量中封應未晚父老望吾皇

題故盧諫議書堂

裴處權

河南少尹

倚杖溪亭曙迴環勝畫圖峰巒摩碧落雲水誤清都  
潭冷知龍卧巢低惜鶴孤石苔攜瑞錦松露綴真珠  
小隱前朝盛幽棲近日無他年婚嫁畢絕頂老樵蘇  
五言絕句

輶轅坂

楊奐

京兆宣撫司參議

盤盤十三曲石嶺瘦崢嶸脚底有平地何人險處行

太室

楊奐

茂陵骨已朽萬歲空虛傳莫上中峰頂秦城隔暮煙

少室

楊奐

方若植巍冠森若削寒玉明夜月中遊誰家借黃鵠

啓母廟

楊奐

頑石立在世啓母人亦知可憐宋太后死罵寧馨兒

少姨廟

楊奐

路傍雙闕老蔓草入荒祠時見山家女燒香乞繭絲

盧巖

楊奐

避名名自至身瘠道還腴未到千年後空巖已姓盧

龍潭

楊奐

壯哉昌黎筆談笑排佛禍不言動鬼神翻疑觸雷火

五渡水

楊奐

幾時落東溪曲折臥天漢語似登山人可飲不可盥

測景臺

楊奐

一片開元石愈知天地中今宵北窻夢或可見周公

箕山

楊奐

土堦墮渺茫多少曹與馬底事住青山近代無讓者

潁水

楊奐

邂逅洗耳翁去飲上流水此日儻相逢黃犢應渴死

巢父塚

楊奐

既知田間樂焉知田間苦惟是唐虞朝所以有巢父

七言絕句

遊法王寺偶觀殿壁馮內翰叔獻雷御史希顏  
張伯英伯玉昆仲及諸名勝留題和韻輒不自

揆勉齋前押

梁宜

堂廊分級赴崖高棟接楹聯互轄膠若就岑樓觀寸  
木連雲屢劣蓋頭茅

其二

積山曾藉細塵高可道澄河小寸膠自媿穠華久昏  
昧今朝賴拔塞心茅

少林寺

五首今錄二首

崔伯淵

肅政廉訪  
司副使

初祖恩恩東向來心中已覺五花開要知面壁九年  
意立雪齊腰心不迴

其二

禪宗一派自西來五葉花枝從此開  
僧伴白雲無箇事香煙朝暮鎖青苔

宿少林

史鐔御史

過客東來宿少林山僧禪榻冷雲深  
天風驚覺三生夢松杪秋聲響玉琴

嵩書卷之十四終

門人傅性良校字